

CONVENIO DE COLABORACIÓN PARA A REALIZACIÓN DO EVENTO “V ENCUENTRO INTERNACIONAL PLAYGROUNDS” NA CIDADE DA CULTURA DE GALICIA

MEMORIA XUSTIFICATIVA

O Secretario do Padroado da Fundación Cidade da Cultura de Galicia, **DECLARA:**

Que esta Fundación Cidade da Cultura de Galicia formalizou o 13 de setembro de 2019 con ASOCIACIÓN LUDANTIA ARQUITECTURA Y EDUCACIÓN o instrumento convencional arriba referido por unha duración prevista para a realización do V ENCUENTRO INTERNACIONAL PLAYGROUNDS e os días precisos para tarefas de montaxe, sen posibilidade de prórroga.

Que o instrumento convencional ten por obxecto:

A cesión temporal a título gratuito de espazos prevista na cláusula terceira do convenio (vinculada ao calendario de actividades previsto en ANEXO I), para a celebración do V ENCUENTRO INTERNACIONAL PLAYGROUNDS”, no marco das actividades que se realizan para a exposición “Argallar, Exposición para xogar coa arquitectura”.

Que o instrumento convencional que se pretende asinar se fundamentan no seguinte:

Segundo o artigo 6 dos estatutos da Fundación Cidade da Cultura de Galicia constitúe o seu obxecto social “a creación, explotación e promoción de áreas ou centros de conservación, produción, exhibición e consumo cultural, comunicativo e tecnolóxico, que constitúa un espazo multifuncional, multidisciplinar e aglutinador, propicio á interacción cultural”.



Para a consecución dos fins mencionados no punto anterior, e consonte o previsto no artigo 7 dos seus Estatutos, a FUNDACIÓN pode realizar (entre outras) as seguintes actividades:

a) As necesarias para converterse nun actor clave na difusión cultural, que serva de punto de encontro entre os cidadáns e a cultura.

c) As tendentes a propiciar o achegamento da Cidade da Cultura de Galicia dun xeito físico á cidadanía, servindo como espazo de desenvolvemento de actividades non estritamente culturais, con especial énfase no lecer, o contacto coa natureza e o deporte. Así pois, en virtude do mandamento estatutario, a FUNDACIÓN promove a realización todo tipo de actividades de carácter cultural e de lecer, como mostra de integración da cultura internacional con actividades de espaxamento e eventos sociais, e procura a consecución dos seguintes obxectivos;

-Ofertarlle á cidadanía unha actividade e programación de calidade, acorde coa magnitude do contedor arquitectónico.

-Constituírse como o espazo natural de desenvolvemento, proxección e fomento da innovación do sistema cultural galego.

A Cidade da Cultura preséntase como un dos maiores espazos de Galicia dedicados á oferta cultural e de entretemento. Os eventos e actividades realizados no Gaiás contribúen o desenvolvemento e enriquecemento do seu público, e proporcionan valor engadido ó tecido cultural galego.

Neste sentido, a Fundación Cidade da Cultura de Galicia dentro do seu programa de exposicións, inclúe a organización, desenvolvemento ou apoio de eventos culturais de



interese para a difusión da Cidade da Cultura de Galicia, entre os que se atopa a exposición *Argallar, Exposición para xogar coa arquitectura*, que se celebrará no Museo Centro Gaiás, entre o 13 de setembro e o 10 de novembro de 2019, e que, cos seus xogos de construción de carácter xeométrico ofrece unha experiencia amena para grandes e pequenos. Oferta un espazo onde desenvolver as accións e gozar dun tipo de xogo, para cada posibilidade e conveniencia. Trátase, en definitiva, de ofrecerlles as familias, pero sobre todo aos nenos, a posibilidade de conxugar habilidade e diversión a través dos enxeñosos dispositivos lúdicos que se espallarán polo Museo Centro Gaiás e ao alcance de todos os públicos.

Pola súa parte, a Asociación Ludantia, Arquitectura y Educación é unha asociación de ámbito estatal sen ánimo de lucro, co obxectivo de fortalecer e dar visibilidade ás accións e investigacións realizadas no campo da arquitectura, a educación e a infancia no ámbito estatal. Constituíuse, así mesmo, co obxectivo de difundir, defender e promover a Convención Internacional sobre os Dereitos do Neno; a recoñecer e potenciar o dereito á educación, o dereito á participación, o dereito á libre expresión dos máis novos na sociedade, e en xeral, todos aqueles dereitos urbanos que lles son propios; a ser un punto de encontro para o diálogo entre arquitectura e educación nas diferentes etapas da vida, onde se propicie a transversalidade entre as disciplinas e axentes participantes, mediando socialmente na procura da innovación, a divulgación e a investigación como xeradora de coñecemento; e para incidir socialmente desde a cultura artística e arquitectónica, na importancia do espazo que habitamos (edificios, barrios, camiños e espazos escolares, pobos e cidades, territorio e paisaxe) co seu patrimonio cultural e o seu ambiente como un axente educador, considerando o seu deseño como un modelo válido para o cambio e a transformación social.

A Asociación Ludantia, Arquitectura y Educación é a organizadora do evento " V ENCUENTRO INTERNACIONAL PLAYGROUNDS". O obxecto do dito encontro é



a de establecer un marco de discusión sobre como deseñar espazos de xogo e creatividade para conectar o mundo arquitectónico co ámbito educativo.

A Fundación considerou que a celebración do evento " V ENCUENTRO INTERNACIONAL PLAYGROUNDS" na Cidade da Cultura de Galicia pode contribuír ao desenvolvemento e enriquecemento do tecido cultural galego e o traslado a un grupo de poboación moi xove, de coñecementos no campo da arquitectura, a educación e a infancia, e que complementa as actividades derivadas da programación da exposición Argallar, Exposición para xogar coa arquitectura, que se celebrará no Museo Centro Gaiás, entre o 13 de setembro e o 10 de novembro de 2019.

Que os intereses converxentes das partes asinantes exclúen o ánimo de lucro, e non poden satisfacerse axeitadamente mediante a celebración dun contrato dos contemplados na Lei 9/2017, do 8 de novembro, de contratos do sector público, pola que se traspoñen ao ordenamento xurídico español as Directivas do Parlamento Europeo e do Consello 2014/23/UE e 2014/24/UE, de 26 de febreiro de 2014, ou doutro instrumento alleo á natureza estritamente convencional.

En atención ao exposto, e a fin de dar cumprimento ao preceptuado no artigo 15.2. da Lei 1/2016, de 18 de xaneiro, de transparencia e bo goberno, estímase xustificado o recurso á sinatura do instrumento convencional que se pretende, con exclusión doutras figuras.

E para que conste, asíñase esta memoria, en Santiago de Compostela

Manuel Vila López

Secretario do Padroado

Fundación Cidade da Cultura de Galicia

